

銅熨斗齋隨筆



銅熨斗齋隨筆卷五

嘉興沈濤撰

甘陵

三國魏志太祖紀今以冀州之河東河內魏郡趙國中山常山鉅鹿安平甘陵平原凡十郡封君爲魏公濤案郡國志河東河內屬司隸校尉部平原屬青州刺史部甘陵本清河國桓帝建和二年改則三郡之屬冀州亦漢末所改隸王光祿

鳴盛

謂司馬氏郡國建置皆據永和之籍信矣

地

倭傳詔書報倭女王曰今以絳地交龍錦五匹絳地縐粟罽十張答汝所獻貢直又特賜汝紺地句文錦三匹濤案

地猶言質今人猶以錦繡之本質爲地其語蓋古裴世期以爲地應爲綈者非也

許昌

吳志孫破虜討逆傳妖賊許昌起于句章自稱陽明皇帝與其子韶扇動諸縣衆以萬數堅以都司馬募召精勇得千餘人與州郡合討破之注引靈帝紀曰昌以其父爲越王也濤案范書靈帝紀曰熹平元年十一月會稽人許生自稱越王寇郡縣遣揚州刺史臧旻丹陽太守陳夤討之章懷注引東觀記曰會稽許昭聚衆自稱大將軍立父生爲越王攻破郡縣與此皆不相應世期所引當是華嶠等書昭之作韶疑承祚避晉諱改然東觀以生爲昭之父而

此則以爲昭之祖亦不相應陽明乃昌僭用之年號也

察戰

三嗣主孫休傳永安五年使察戰到交趾調孔尊大豬注云察戰吳官名今揚都有察戰巷濤案察戰當是人姓名元和姓纂十四黠云察姓見姓苑是當時本有此姓若書官而不書人姓名承祚書無此例他史亦無此例也孫奮傳注引江表傳曰皓遣察戰齎藥賜奮當卽其人晉書五行志云吳孫休嬖人張布專擅國勢韋昭盛冲終斥不用兼遣察戰等爲內史驚擾州郡是察戰乃休之幸臣世期以爲官名當是傳寫有誤

又案御覽一百九十五居處部引丹陽記曰七戰巷者庾

亮與蘇峻戰宣陽門外峻初九退尋復來攻立戰者七亮乃南奔故有此名然則察戰巷者七戰巷之誤

又案宋書五行志作蔡戰乃淺人疑察非姓遂爾妄改非隱侯元文如此

又案晉書陶璜傳孫皓時交阯太守孫資貪暴爲百姓所患會察戰鄧荀至擅調孔雀三千頭遺遊林陵郡吏呂興殺資及荀以郡內附則察戰似是鄧資起官名矣然攷呂興之叛吳志在孫休永安六年而晉書則在孫皓時且但言殺資不言殺荀或爾時戰與荀二人均至交阯荀被殺而戰逃歸故至孫皓時復令賁藥賜奮耳

臨川郡

周魴傳賊帥董嗣負阻劫鈔豫章臨川並受其害注云孫亮太平二年始立臨川郡是時未有臨川濤案亮分豫章東郡都尉立臨川郡見三嗣主傳然朱然傳曰權分丹陽爲臨川郡然爲太守裴世期以爲此郡尋罷非今臨川則孫權時別有臨川郡矣此傳所云當卽此郡時尙未罷耳

季漢輔臣贊

王光祿十七史商榷云楊戲諸葛丞相贊首用濱真文韻第八句用風韻第九句用心韻第十句用身韻風古音在侵此以風與心爲韻間雜二韻於其間而身則仍與濱真文爲韻濤案此說非是季漢輔臣贊所用韻皆與今不同亦與詩騷古音間有出入當是漢魏時音韻如此未可以

陸法言切韻繩之卽如王元泰諸人贊用眞文林三字爲韻此卽侵眞二部通用之證又豈有他韻間雜其間耶又昭烈贊鍾字與方生爲韻馬孟起贊亡字與同龍爲韻李正芳贊端字與綱喪爲韻皆與唐韻不同余嘗擬作漢魏古音攷繼三山陳氏毛詩屈宋二書之後迄未暇也

郝經改修三國志

郝經陵川集壽正甫書狀詩新書總付徐無黨半臂誰添宋子京注云時余改修三國志正甫爲余集注故有徐無黨宋子京之句是伯常嘗改修三國志且有注矣今元史本傳載經所著書無此錢氏元史藝文志亦失載

牛金牛欽

晉書元帝紀初平石圖有牛繼馬後故宣帝深忌牛氏遂爲二楹共一口以貯酒焉帝先飲佳者而以毒酒鴆其將牛金而恭王妃夏侯氏竟通小吏牛氏而生元帝宋書符瑞志亦載其說此本之孫盛晉陽秋見太平御覽九十八皇王部所引惟孫盛書言小吏牛欽與牛金之名形聲俱相近故魏書僭晉司馬叡傳誤以爲晉將牛金子劉知幾史通亦云沈約晉書約未嘗爲晉書蓋宋書之誤喜造奇說稱元帝牛金之子以應牛繼馬後之徵皆因金與欽聲近而輾轉訛謬耳

穹天論

天文志虞聳立穹天論宋書隋書皆同而祖緼天文錄曰

虞曷作穹天論

太平御覽
二天部引

聳曷皆仲翔子未知孰是御覽

又引賀道養渾天記曰穹天由於虞喜喜乃曷字之誤玉
海二正引作曷喜自作安天論耳

陽羨

地理志云惠帝永興元年以周玘創業討石冰割吳興之
陽羨并長城之北鄉置義鄉國山臨津并陽羨四縣又分
丹楊之永世置平陵及永世凡六縣立義興郡以表玘之
功濤案晉志吳興郡屬縣並無陽羨蓋傳寫誤奪且云郡
統縣十一今數之止十縣其所缺者卽陽羨也

播有波音

樂志宗廟謠詩道澤乎播與和過爲韻后妃左貴嬪傳元

楊皇后誅澤隨雨播與歌字爲韻皆讀播如波禹貢滎波
既豬史記夏本紀作滎播既都周禮職方氏其浸波漾注
波讀爲播是古播有波音也

匡謬正俗讀歌
爲古賀反誤

登歌句倒

樂志祠宣皇帝登歌曰於鑠皇祖聖德欽明勤施四方夙
夜敬止濤案魏晉音韻原與唐韻不同而明止二字總無
相協之理蓋勤施二語傳寫誤倒當時本以方明二字爲
韻耳又祠景皇帝登歌以哲思爲韻蓋哲字古音如制思
字亦讀去聲也

竿兒

樂志曰成帝咸康七年除高組紫鹿跂行鼈食及齊王捲

衣竿兒等樂宋書樂志亦載其說濤案竿兒南齊書樂志作竿鼠則兒乃鼠字之誤齊志又有絕倒五案等伎蓋卽顧臻表所云逆行連倒頭足入筥之屬咸康齊志作咸和乃傳寫之誤

力在左

五行志石勒爲郭敬客時襄國有謠曰古在左月在右讓去言或入口古在左月在右胡字也讓去言爲襄也或入口爲國也至勒始都之濤案劉敬叔異苑載此謠云力在左革在右讓無言或入口謠識皆離合姓名若異苑所云方爲勒據襄國之驗若十六國無非胡人古月云云何以必其爲石趙耶

元楊皇后誄

后妃左貴嬪傳載其元楊皇后誄曰峨峨元后光嬪晉室
伉儷聖皇比蹤往古案古不得與室字爲韻當爲哲字之
誤又執事有恪與帛夕爲韻蓋讀恪如格

正始

衛玠傳不意永嘉之末復聞正始之音正始謂魏齊王芳
年號唐李善上文選注表虛元流正始之音氣質馳建安
之體以建安對正始亦謂年號後人乃作正其始解明高
棣唐詩品彙竟以正始正則分體誤矣李商隱上京兆相
公啟宮商資正始之音寒暑協中和之序是唐末卽已誤
解

東瀛

新蔡王騰傳封東瀛公太平御覽十二天部引晉書作東

瀛

此乃王隱臧榮緒等書非今唐修之晉書也

案地志無東瀛亦無東瀛瀛縣

屬泰山郡或爾時尚有東瀛縣後乃并省則作瀛爲是

益都耆舊傳

陳壽傳撰益都耆舊傳十篇濤案蜀志李譔傳曰又有漢中陳術字申伯亦博學多聞著益都耆舊傳及志兩都字皆部字之誤則此書似非承祚所撰隋書經籍志益部耆舊傳十四卷陳長壽撰長壽疑亦術之一字又云續益部耆舊傳二卷或卽承祚之書與

魏氏春秋

孫盛傳著魏氏春秋晉陽秋濤案盛避晉鄭太后諱改春秋爲陽秋則魏氏春秋亦當改爲陽秋今仍作春秋隋書經籍志亦作春秋當是後人追改

習鑿齒漢晉春秋隋志正作陽秋

王隱

忠義麴允傳吳皮王隱之徒無賴凶人皆加重爵此又一王隱非撰晉書之人

三劉毅

晉有兩劉毅一在西晉之初一在東晉之末史皆有傳又案晉書向雄傳曰河內山陽人初仕郡爲主簿太守劉毅嘗以非罪笞雄又曰累遷黃門侍郎時劉毅爲侍中同在門下武帝勅令復君臣之好攷毅傳魏時未嘗爲河內太

守入晉亦不爲侍中是同時又有一劉毅也

武羣

乞伏國仁載記以其將乙旃音涅爲左相屋引出爲右相
獨孤匹蹄爲左輔武羣勇士爲右輔濤案乙旃屋引獨孤
皆代北複姓武羣當亦是姓而姓氏書皆不載

晉諸公讚

隋書經籍志晉諸公讚二十一卷晉秘書監傅暢撰案晉
書暢傳作晉諸公敘讚二十二卷卷數不同蓋隋志不數
其敘之一卷又暢傳云又爲公卿故事九卷隋志作晉公
卿禮秩故事

劉統

宋書後廢帝紀每出入去來常自稱劉統或自號李將軍
案劉統后妃傳作李統廢帝母陳貴妃太宗嘗以乞李道
生故民中皆呼帝爲李家子則作李者是也南史后妃傳
亦作李統南齊書劉休傳云陳太妃先爲李道兒妾故蒼
梧微行嘗自稱爲李郎焉

合祖賦序

禮志合祖賦序曰漢用丙丁魏用丁未晉用孟月之酉云
云濤案此乃稽含祖道賦序文見初學記十三禮部所引
合乃含字之誤傳寫又奪稽字耳

關

禮志載關事儀云準於黃案年月日右方關門下位年月

下右方附列尙書衆官署其尙書名下應云奏者今言關餘皆如黃案式又有辭拜詔除關板文則關乃下白上之名非如今以爲平移文案之稱也

興古

州郡志甯州興古太守漢舊郡晉太康地志故牂牁何志劉氏分建甯牂牁立則是後漢末省也濤案兩漢志皆無興古郡晉志始有之云蜀置不知隱侯何以云然何氏云劉氏分立似謂劉焉父子則省并當在昭烈時亦不得云蜀置矣

灌佛

劉敬宣傳四月八日敬宣見衆人灌佛乃下頭上金鏡以